

Komunikadu Imprensa
Tribunál Distritál Suai
23 Dezembru 2016

JSMP husu ba Ministériu Públiku no Tribunál atu analiza no elabora ho kuidadu kazu natureza seksuál sira antes halo desizaun

JSMP husu ba Ministériu Públiku no Tribunál atu analiza no elabora ho kuidadu kazu ho natureza violasaun seksuál sira antes halo desizaun tanba kazu ida-idak iha nia natureza propriu.

JSMP preokupa katak iha 22 Dezembru 2016, Tribunál Distritál Suai absolve arguidu VMB tanba konsidera arguidu ninia hahalok la prenxe elementus sujetu husi krime abuzu seksuál ba menór ne'ebé akontese iha 13 Novemburu 2015, iha Distritu Suai-Covalima.

Ministériu Públiku akuza arguidu kontra artigu 177 alinea (2) KP kona-ba krime abuzu seksuál ba menór ho aktus relevante ho labarik ne'ebé seidauk tinan 14 sei hetan pena prizaun tinan 5 to'o 15.

Iha prosesu julgamentu arguidu konfesa totalmente ba faktus hosi akuzasaun Ministériu Públiku no deklara katak kazu ne'e sira rezolve ona tuir kultura lisan Timor nian no fó sala ona ba lezada karau ida, osan US\$600, foos karon ida, masin-midar kg 5 no tua manas litru 5.

Iha parte seluk, lezada deklara katak wainhira kazu ne'e akontese nia toba dukur hela no arguidu kaer nia liman mak nia hakfodak no hare arguidu tuur hela iha nia sorin. Tanba ne'e lezada halai sai ba fó hatene nia alin nain rua tanba lezada nia inan-aman sira la iha uma. Wainhira lezada nia inan-aman to'o mai uma mak deskobre katak arguidu nia esperma iha lezada nia lensol.

Iha desizaun Tribunál nian konsidera katak arguidu tama ba uma laran wainhira lezada toba dukur hela no kaer nia orgaun seksuál no halo masturbasaun, la konstitui hanesan aktu krime ruma. Tribunál konsidera katak tanba iha momentu ne'ebá lezada toba dukur hela nune'e lezada la hare saída mak arguidu halo. Aleinde ne'e, Tribunál mós deskobre katak lezada nia idade tinan 14 fulan 3 tanba ne'e lezada la'os ona menoridade.

“Desizaun ne’ e la-aproriadu no sei iha-risku boot tebes tanba fó oportunidade ba arguidu potensial seluk atu komete krime hanesan iha futuru tanba ema bele aprende hosi frakeza iha desizaun tribunál nian”, dehan Luis de Oliveira Sampaio, Diretor Executivo JSMP.

Iha kazu ho natureza seksuál sira, importante teb-tebes atu asegura katak elementu no sirkunstánsia relevante sira hetan konsiderasaun nune’ e, evita desizaun ne’ebé absolve totalmente arguidu, enkuantu arguidu rasik deklara katak nia komete duni krime ne’ebé alega ba nia.

Iha artigu 15 (1) KP define katak *Aje ho dolu ema ne’ebé hatene daudaun katak faktu ida prenxe krime ida nia tipu, aktua ho intensaun atu realiza faktu ne’ e*.

Kazu ne’ e hatudu katak arguidu iha motivasaun no intensaun seksuál no uza lezada hanesan objetu seksuál atu satisfáz arguidu nia interesse/dezeju seksuál, embora arguidu la konsege halo agresaun seksuál ruma hasoru lezada. Ida-ne’ e tuir loloos juis tenke konsidera katak aktu ne’ e la-apropriadu tanba arguidu aproveita lezada ninia dukur hodi pratika aktu referidu.

Tuir loloos Tribunál halo alterasaun jurídiku hosi krime abuzu seksuál ba menór ba fali krime aktu seksuál ho adolexente ho pratika aktu seksuál relevante ho labarik tinan 14 to’o 16 kuandu Tribunál prova katak lezada idade liu ona tinan 14. Aleinde ne’ e, posivelmente Tribunál mós bele kondena arguidu ho artigu 185 KP kona-ba violasaun ba domisíliu tanba arguidu tama iha lezada nia uma sei autorizasaun hosi lezada.

Ministériu Públiku no Tribunál deviaser utiliza artigu rua ne’ e sai hanesan baze atu foti desizaun ne’ebé justu. Tuir JSMP la justu kuandu ema deskoñesidu ruma tama ba ema seluk nia uma laran sein autorizasaun no pratika aktu seksuál relevantes hanesan halo masturbasaun no Tribunál konsidera katak aktu ne’ e lakonstitui kriminál no laiha efeitu ruma ba lezada no absolve totalmente arguidu.

Dezisaun ne’ e hatudu katak autoridade judisiáriu sira falla atu identifika elementus no dolu husi krime ida inklui sirkunstánsia asosiadu seluk. Ida-ne’ e sei fó impaktu ba desizaun hanesan saida mak akontese dadaun ba kazu ida-ne’ e.

JSMP recomenda ba Ministériu Públiku nu’udar titulár ba asaun penál ne’ebé reperezenta direitu lejítimu vítima sira iha kualker aktu krime ruma atu analiza klean sirkunstánsia hotu-hotu, liu-liu kazu sira ho natureza violénsia seksuál nune’ e bele iha pozisaun ida ne’ebé forte iha alegasaun finál.

JSMP mós husu ba Tribunál ne’ebé nu’udar autoridade judisiáriu ultímu hodi foti desizaun tenki tetu no analiza faktus hotu inklui sirkunstánsia ne’ebé mak haleu krime ne’ e, antes halo dezisaun ba kazu ruma.

Julgamentu akordaun ne'e prezide hosi juis koletivu, Dr. Constancio Barros Basmery, Dr. Argentino Luisa Nunes no Dr. Samuel da Costa Pacheco. Ministériu Públiku reprezenta husi Dr. Matias Soares no arguidu hetan defeza hosi Dr. Albino de Jesus Pereira.

Atu hatene informasaun liutan bele kontaktu:

Luis de Oliveira Sampaio
Diretór Ezekutivu JSMP
Direasaun e-mail:luis@jsmp.tl